

МЕСЯЦА ДЕКЕМВРИА В 25 ДЕНЬ

РОЖДЕСТВО ГОСПОДА И БОГА НАШЕГО ИИСУСА ХРИСТА

При часе 7-м дне начинаем вечерню. Аще ли в субботу вечера, поем: Блажен муж, кафисму всю. Аще же в неделю вечера, поем точно 1_й антифон. Во ин день, стихология не бывает.

На Господи воззвах, поем стихиры праздника на 8.

Глас 2-й, самогласны:

[Германово:]

Приидите, возрадуемся Господеви, / настоящую тайну сказующе: / средостение градежа разрушися, / пламенное оружие плещы дает, / и Херувим отступает от древа жизни, / и аз райския пищи причащаюся, / от негоже произгнан бых преслушания ради. / Неизменный бо Образ Отець, / Образ присносуция Его, зрак раба приемлет, / от неискусобрачныя Матере прошед, / не преложение претерпев: / еже бо бе, пребысть, / Бог сый истинен: / и еже не бе прият, / Человек быв человеколюбия ради, Тому возопиим: / Рождейся от Девы Боже, помилуй нас. **[Дважды]**

[Анатолиево:]

Господу Иисусу / рождшуся от Святыя Девы, / просветишася всяческая: / пастырем бо свиряющим, / и волхвом покланяющимся, / Ангелом воспевающим, / Ирод мяташеся, яко Бог во плоти явися, / Спас душ наших. **[Дважды]**

Царство Твое Христе Боже, / Царство всех веков, / и владычество Твое во всяком роде и роде, / воплотивыйся от Духа Святаго, / и от Приснодевы Марии вочеловечивыйся, / свет нам возсия Христе Боже Твое пришествие, / Свет от Света, / Отчее Сияние, / всю тварь просветил еси. / Всякое дыхание хвалит Тя, / Образ славы Отчия: / Сый, и прежде Сый, / и возсиявый от Девы Боже, / помилуй нас. **[Дважды]**

Что Тебе принесем, Христе, / яко явился еси на земли / яко человек нас ради? / каяждо бо от Тебе бывших тварей, / благодарение Тебе приносит: / Ангели пение, небеса звезду, / волсви дары, пастырие чудо, / земля вертеп, / пустыня ясли: / мы же, Матерь Деву. / Иже прежде век Боже, помилуй нас. **[Дважды]**

Слава, и ныне: глас тойже:

[Кассино:]

Августу единоначальствующу на земли, / многоначалие человеков преста: / И Тебе вочеловечшуся от Чистыя, / многобожие идолов упразднися. / Под едином царством мирским грады быша, / и во едино владычество Божества языцы увероваша. / Написашася людие повелением Кесаревым, / написахомся вернии именем Божества, / Тебе вочеловечшася Бога нашего. / Велия Твоя милость, / Господи, слава Тебе!

Вход. Свете Тихий: Прокимен дне.

И чтения по чину их, с тропари и со стихи их.

**Аще прилучится Навечерие Рождества Христова в пяток, прокимен поется:
Кто бог велий, яко Бог наш: со стихи своими. Дневный же оставляется.**

Бытия чтение. [Глава 1.]

В начале сотвори Бог небо и землю. Земля же бе невидима и неустроена, и тьма верху бездны: и Дух Божий ношашеся верху воды. И рече Бог: да будет свет, и бысть свет. И виде Бог свет, яко добро: и разлучи Бог между светом, и между тьмою. И нарече Бог свет день, и тьму нарече ночь. И бысть вечер, и бысть утро, день един. И рече Бог: да будет твердь посреде воды, и да будет разлучающи посреде воды и воды: и бысть тако. И сотвори Бог твердь: и разлучи Бог между водою, яже бе под твердию, и между водою, яже бе над твердию. И нарече Бог твердь, небо: и виде Бог, яко добро. И бысть вечер, и бысть утро, день второй. И рече Бог: да соберется вода, яже под небесем, в собрание едино, и да явится суша: и бысть тако. И собрася вода, яже под небесем в собрания своя, и явися суша. И нарече Бог сушу землю: и собрания вод нарече моря. И виде Бог, яко добро. И рече Бог: да прорастит земля былие травное, сеющее семя по роду и по подобию, и древо плодовитое творящее плод, емуже семя его в нем по роду на земли: и бысть тако. И изнесе земля былие травное, сеющее семя по роду и по подобию, и древо плодовитое творящее плод, емуже семя его в нем по роду на земли: и виде Бог, яко добро. И бысть вечер, и бысть утро, день третий.

Числ чтение: [Глава 24.]

Бысть Дух Божий на Валааме, и восприем притчи своя, рече: коль добри доми твои Иакове, и скиния твоя Израилю! Яко страны осеняющия, яко садие при реках, и яко скиния, яже водрузи Господь, и яко кедри при водах. Изыдет человек от семене его, и обладает языки многими, и возвысится царство его, и возрастет. Бог наставит его из Египта, яко славу единорога его. Пояст языки враг своих, и толщу их измождит: и стрелами своими устрелит врага. Возлег почи яко лев, и яко скимен, кто возставит его? Благословящий тя благословени, и проклинаящий тя, прокляти. Возсияет звезда от Иакова, и встанет человек от Израиля, и ссечет князи Моавитския: и пленит вся сыны Сифовы, и будет Едом достояние, и будет наследие Исав враг его, и Израиль сотвори крепость.

Пророчества Михеина чтение. [Главы 4 и 5.]

Во днех оных, глаголет Господь: соберу сокрушенную, и отриновенную прииму, яже отринух: и положу сотрленную во останок, и отриновенную в язык крепок, и воцарится Господь над ними в горе Сионстей, от ныне и во веки. И ты, Вифлееме доме Евфрафов, еда мал еси, еже быти в тысящах Иудовых? Из тебе бо Мне изыдет Старейшина, еже быти в Князя во Израили: и исходи Его из начала, от дней века. Сего ради даст я до времени раждающия, породит, и прочии от братий Его обратятся к сыном Израилевым. И станет, и узрит, и упасет паству Свою крепостию Господь. И в славе имене Господа Бога своего пребудут, зане ныне возвеличится даже до конец земли.

Таже возгласит чтец, глас 6: и нам воставшим, глаголет тропарь сей:

Тайно родился еси в вертепе, / но небо Тя всем проповеда, / якоже уста звезду предлагая, Спасе, / и волхвы Ти приведе / верою покланяющихся Тебе: / С нимиже помилуй нас.

Стих 1: Основания Его на горах святых, любит Господь врата Сионя, паче всех селений Иаковлих. Преславная глаголашася о тебе, граде Божий. Помяну Раав и Вавилона ведущим Мя.

И поем конец: И волхвы Ти приведе верою покланяющихся Тебе: / с нимиже помилуй нас.

Стих 2: И се иноплеменницы, и Тир, и людие Ефиопстии, сии быша тамо. Мати Сион речет: человек и человек родися в нем, и той основа и Вышний.

И паки: И волхвы Ти приведе верою покланяющихся Тебе: с нимиже помилуй нас.

Стих 3: Господь повесть в писании людей, и князей сих бывших в нем, яко веселящихся всех жилище в Тебе.

И паки: И волхвы Ти приведе верою покланяющихся Тебе: с нимиже помилуй нас.

Таже, Слава И ныне,

Тайно родился еси в вертепе, / но небо Тя всем проповеда, / якоже уста звезду предлагая, Спасе, / и волхвы Ти приведе / верою покланяющихся Тебе: / С нимиже помилуй нас.

И чтутся паки чтения сия:

Пророчества Исаина чтение. [Глава 11.]

Также глаголет Господь: изыдет жезл от корене Иессеова, и цвет от корене его взыдет. И почиет на нем Дух Божий: Дух мудрости и разума: Дух совета и крепости: Дух ведения и благочестия: Дух страха Божия исполнит его. Не по славе судит, ниже по глаголанию обличит: но судит правдою смиренных суд, и обличит правостою славныя земли. И поразит землю словом уст Своих, и духом устен убьет нечестиваго. И будет правдою препоясан по чреслах Своих, и истиною обвит по ребром Своим. Тогда пожирует волк со агнцем, и рысь почиет с козлицем: и телец, и лев, и юнец вкупе пожируют, и отроча мало поведет их, телец и лев вкупе пасутся, и вкупе чада их будут: и лев яко вол снесть плевры. И отроча младо на пещеру аспидску, и на ложе племени аспидска руку возложит. И не сотворят зла, ниже имут погубити ни единаго же на горе святей Моей: занеже исполнися вся земля познати Господа, яко воде мнозе покрыти моря. И будет в день он корень Иессеев, и востаяй владети языки: на него языцы уповают, и будет покой его честь.

Пророчества Иеремиина чтение. [Варуха, главы 3 и 4.]

Сей Бог наш, не приложится ин к Нему. Изобрете всяк путь художества, и даде Иакову отроку Своему, и Израилю возлюбленному от Него. Посем же на

земли явися и с человеки поживе. Сия книга повелений Божиих, и закон сый во веки, вси держащиися ея в живот, оставившии ея умрут. Обратися Иакове, и имися ея, поиди к сиянию прямо света ея. Не даждь иному славы твоея, и полезных тебе языку чуждему. Блажени есмы Израилю, яко угодная Богу нам разумна суть.

Пророчества Даниилова чтение. [Глава 2.]

Рече Даниил Навуходоносору: ты царю видел еси, и се образ един, образ оный велик, и обличие его округло, стояше пред лицом твоим: и видение его страшно, образ, егоже глава от злата чиста: руце и перси и мышцы его серебряны: чрево и стегны медяны: голени железны: нозе часть убо железна, и часть некая скудельна. Видел еси, дондеже отторжеса камень от горы без рук, и порази образ, на ноги железныя, и скудельныя, и истни я до конца. Тогда истнишася во едино, скудель, железо, медь, серебро, золото и быша яко прах от гумна жатвеннаго, и взят я множество дохновения, и место не обретеса им: камень же поразивый образ, бысть в гору велию, и исполни всю землю. Сие есть соние: а сказание его речем пред царем: возставит Бог Небесный Царство, еже во веки не истлеет, и Царство Его людем иным не оставится, и истнит и измождит вся царствия, и то востанет во веки. Имже образом видел еси, яко от горы отсечеса камень без рук, и сотры скудель, железо, медь, серебро, золото. Бог Великий сказа царю, имже подобает быти по сих и истинно соние, и верно сказание его.

Посем чтец глаголет тропарь сей, глас 6:

Возсиял еси Христе, / от Девы разумное Солнце правды: / и звезда Тя показа в вертепе вмещающася Невместимаго. / Волхвы наставил еси на поклонение Твое, / с нимиже Тя величаем: / Жизнодавче, слава Тебе.

Стих 1, псалом 92: Господь воцарися, в лепоту облечеса: облечеса Господь в силу, и препоясася: ибо утверди вселенную, яже не подвижится. Готов престол Твой оттоле, от века Ты еси.

Таже, паки: Волхвы наставил еси на поклонение Твое, / с нимиже Тя величаем: Жизнодавче, слава Тебе.

Стих 2: Воздвигоша реки Господи, воздвигоша реки гласы своя. Возмут реки сотрения своя, от гласов вод многих.

Таже, паки: Волхвы наставил еси на поклонение Твое, / с нимиже Тя величаем: Жизнодавче, слава Тебе.

Стих 3: Дивны высоты морския, дивен в высоких Господь: свидения Твоя уверишася зело: дому Твоему подобает святыня Господи, в долготу дней.

Слава, И ныне,

Возсиял еси Христе, / от Девы разумное Солнце правды: / и звезда Тя показа в вертепе вмещающася Невместимаго. / Волхвы наставил еси на поклонение Твое, / с нимиже Тя величаем: / Жизнодавче, слава Тебе.

Конец же тропаря поет чтец сам, и посем чтет:

Пророчества Исаина чтение. [Глава 9.]

Отроча родися нам, Сын и дадеся нам, Егоже начальство бысть на раме Его: и нарицается имя Его велика совета Ангел. Чуден Советник, Бог крепок, Властитель, Начальник мира, Отец будущего века: приведет бо мир на начальники, и здравие Его. И велие начальство Его, и мира Его несть предела, на престол Давидов, и на царство его исправити е, и заступити е судьбою и правдою, от ныне и до века: ревность Господа Саваофа сотворит сия.

Пророчества Исаина чтение. [Главы 7 и 8.]

Приложи Господь глаголати ко Ахазу, глаголя: проси себе знамения у Господа Бога твоего, во глубину или в высоту. И рече Ахаз: не имам просити, ниже искусити Господа. И рече Исаиа: услышите убо доме Давидов, еда мало вам труд подаяти человеком, и како Господу труд даете? Сего ради даст Господь Сам вам знамение: се Дева во чреве приимет, и родит Сына, и нарекут имя Его Еммануил. Масло и мед имать снести, прежде неже уведети Ему, или изволити лукавое, изберет благое: зане прежде неже разумети отрочати благое или злое, отринет лукавая, и изберет благое. И рече Господь ко мне: приими себе свиток нов велик, и напиши в нем писалом человеческим, еже скоро пленение сотворити корыстем: настоят бо. И свидетели мне сотвори верны человеки, Урию иереа, и Захарию сына Варахиина. И приступих ко пророчице, и во чреве прият, и роди сына. И рече мне Господь: нарцы имя ему, Скоро плени, и напрасно испроверзи. Зане прежде неже разумети отрочати прозвати отца или мать, приимет силу Дамаскову, и корысти Самарийския, прямо царю Ассирийскому. С нами Бог, разумеите языцы и покаряйтесь: услышите даже до последних земли, могущии покаряйтесь: аще бо паки возможете, и паки побеждени будете. И иже аще совет совещаете, разорит Господь. И слово, еже аще возглаголете, не пребудет в вас: яко с нами Бог.

Посем ектения малая, и по возгласе:

Прокимен, глас 1:

Прокимен: Господь рече ко Мне: * Сын Мой еси Ты, Аз днесь родих Тя.

Стих: Проси от Мене, и дам Ти языки достояние Твое, и одержание Твое концы земли.

Апостол ко Евреем, зачало 303 (Евр. 1, 1 – 12).

Многочастне и многообразне древле Бог глаголавый отцем во пророцех, в последок дний сих глагола нам в Сыне, Егоже положи наследника всем, Имже и веки сотвори. Иже сый сияние славы и образ Ипостаси Его, нося же всяческая глаголом силы Своея, Собою очищение сотворив грехов наших, седе одесную престола величества на высоких, толико лучший быв Ангелов, елико преславнее паче их наследствова имя. Кому бо рече когда от Ангел: Сын Мой еси Ты, Аз днесь родих Тя? И паки: Аз буду Ему во Отца, и Той будет Мне в Сына? Егда же паки вводит Первороднаго во вселенную, глаголет: и да поклонятся Ему вси

Ангели Божии. И ко Ангелом убо глаголет: Творяй Ангелы Своя духи и слуги Своя огонь палящъ. К Сыну же: престол Твой, Боже, в век века: жезл правости жезл царствия Твоего: Возлюбил еси правду и возненавидел еси беззаконие: сего ради помаза Тя, Боже, Бог Твой елеем радости паче причастник Твоих. И (паки): в начале Ты, Господи, землю основал еси, и дела руку Твоею суть небеса: Та погибнут, Ты же пребываеши: и вся, якоже риза, обетшают, и яко одежду свиeши их, и изменятся: Ты же тойжде еси, и лета Твоя не оскудеют.

Аллилуиа, глас 5:

Стих: Рече Господь Господеви моему: седи одесную Мене, дондеже положу враги Твоя подножие ног Твоих.

Стих: Жезл силы послет Ти Господь от Сиона.

Стих: Из чрева прежде денницы родих Тя, клятвася Господь и не раскается.

Евангелие Луки, зачало 5. (Лк. 2, 1 – 20)

Во время оно изыде повеление от кесаря Августа написати всю вселенную. Сие написание первое бысть владащу Сирию Киринию. И идяху вси написатися, кождо во свой град. Взыде же и Иосиф от Галилеи, из града Назарета, во Иудею, во град Давидов, иже нарицается Вифлеем, зане быти ему от дому и отечества Давидова, написатися с Мариєю обрученою ему женою, сущою непраздною. Бысть же, егда быста тамо, исполнишася дние родити Ей: И роди Сына Своего Первенца, и повит Его, и положи Его в яслех: зане не бе им места во обители. И пастырие беху в тойже стране, бдяще и стрегуще стражу нощную о стаде своем. И се Ангел Господень ста в них, и слава Господня осия их: и убояшася страхом велиим. И рече им Ангел: не бойтеся: се бо благовествую вам радость велию, яже будет всем людем: Яко родися вам днесь Спас, Иже есть Христос Господь, во граде Давидове: И се вам знамение: обрящете Младенца повита, лежаща в яслех. И внезапно бысть со Ангелом множество вой небесных, хвалящих Бога и глаголющих: Слава в вышних Богу, и на земли мир, во человецех благоволение. И бысть, яко отыдоша от них на небо Ангели, и человецы пастырие реша друг ко другу: преидем до Вифлеема и видим глагол сей бывший, егоже Господь сказа нам. И приидоша поспешшеся, и обретоша Мариам же и Иосифа, и Младенца лежаща во яслех. Видевше же сказаша о глаголе глаголаннем им о Отрочати Сем. И вси слышавши дивишася о глаголаных от пастырей к ним. Мариам же соблюдаше вся глаголы сия, слагающи в сердца Своем. И возвратишася пастырие, славяще и хваляще Бога о всех, яже слышаша и видеша, якоже глаголаше бысть к ним.

И порядку Божественная литургия Великаго Василиа.

Вместо Достойно поем: О Тебе радуется:

Причастен: Хвалите Господа с небес:

По отпусте же вжигаем свещник среди церкви, и ставше оба лика вкупе поют тропарь праздника: Слава, и ныне: кондак. И входим в трапезу, и ядим совершенно, рыбы же не ядим, но со древяномаслием, и сочиво обварено, или

кутию с медом. Испиваем же и вина в славу Божию: в не имущих же странах прием пиво. Предлагается же и чтение: Поучение Кирилла архиепископа Иерусалимского, емуже начало: **Я**коже убо во Иисуса Христа надемся:

ВЕДАТИ ПОДОБАЕТ, ЯКО ПРАЗДНИК РОЖДЕСТВА ХРИСТОВА В КИЙ ДЕНЬ НИ СЛУЧИТСЯ, ПОЕТСЯ ПОВЕЧЕРИЕ ВЕЛИКОЕ СИЦЕ:

О часе девятом ноши бывает благовест, и потом трезвон во вся кампаны: иерей же со диаконом оболкшеса, творят начало, якоже во вся праздники Владычни. Диакон глаголет: **Благослови владыко.** Иерей: **Благословен Бог наш: И кадящу иерею, глаголем Повечерие великое от начала:**

Слава Тебе Боже наш, слава Тебе.

Царю Небесный:

Трисвятое, и прочее.

Господи помилуй, 12.

Приидите поклонимся: трижды.

Псалом 4:

Внегда призвати ми, услыша мя Бог правды моея: в скорби распространил мя еси. ущебри мя, и услыши молитву мою. Сынове человечестии, доколе тяжкосердии? вскую любите суету, и ищите лжи? И уведите, яко удиви Господь преподобнаго Своего: Господь услышит мя, внегда воззвати ми к Нему. Гневайтесь, и не согрешайте: яже глаголете в сердцах ваших, на ложах ваших умилитесь. Пожрите жертву правды, и уповайте на Господа. Мнози глаголют: кто явит нам благая? знаменася на нас свет лица Твоего, Господи. Дал еси веселие в сердце моем, от плода пшеницы, вина и елеа своего умножишася. В мире вкупе усну и почию: яко Ты Господи, единаго на уповании вселил мя еси.

Псалом 6:

Господи, да не яростию Твоею обличиши мене, ниже гневом Твоим накажеши мене. Помилуй мя Господи, яко немощен есмь: исцели мя Господи, яко смятошася кости моя. И душа моя смятется зело: и Ты Господи, доколе? обратися Господи, избави душу мою, спаси мя ради милости Твоея: яко несть в смерти поминаяй Тебе, во аде же кто исповестся Тебе? Утрудихся воздыханием моим, измыю на всяку ношь ложе мое, слезами моими постелю мою омочу. Смятется от ярости око мое, обетшах во всех вразех моих. Отступите от мене вси делающие беззаконие, яко услыша Господь глас плача моего. Услыша Господь моление мое, Господь молитву мою прият. Да постыдятся, и смятутся вси врази мои: да возвратятся, и устыдятся зело вскоре.

Псалом 12:

Доколе, Господи, забудеши мя до конца? Доколе отвращаеши лице Твое от мене? Доколе положу советы в души моей, болезни в сердце моем день и ношь? Доколе вознесется враг мой на мя? Призри, услыши мя Господи Боже мой, просвети очи мои, да не когда усну в смерть. Да не когда речет враг мой: укрепихся на него. Стужающие ми возрадуются, аще подвижуся. Аз же на милость Твою уповах: возрадуется сердце мое о спасении Твоем. Воспою

Господеву благодеевшему мне, и пою имени Господа Вышняго. Призри, услыши мя Господи Боже мой, просвети очи мои, да не когда усну в смерть: Да не когда речет враг мой: укрепихся на него.

Слава, и ныне: Аллилуиа, аллилуиа, аллилуиа, слава Тебе Боже. Трижды.

Господи помилуй, трижды.

Слава и ныне:

Псалом 24:

К Тебе Господи, воздвигох душу мою, Боже мой на Тя уповах, да не постыжуся во век, ниже да посмеют ми ся врази мои: Ибо вси терпящии Тя, не постыдятся. Да постыдятся беззаконующии вотще. Пути Твоя Господи, скажи ми, и стезям Твоим научи мя. Настави мя на истину Твою, и научи мя: яко Ты еси Бог Спас мой, и Тебе терпех весь день. Помяни щедроты Твоя Господи, и милости Твоя, яко от века суть. Грех юности моя, и неведения моего не помяни, по милости Твоей помяни мя Ты, ради благодати Твоея Господи. Благ и прав Господь, сего ради законоположит согрешающим на пути. Наставит кроткия на суд, научит кроткия путем Своим. Все путие Господни милость и истина, взыскающим завета Его и свидения Его. Ради Имене Твоего Господи, и очисти грех мой, мног бо есть. Кто есть человек бояйся Господа? Законоположит ему на пути, егоже изволи. Душа его во благих водворится, и семя его наследит землю. Держава Господь боящихся его, и завет Его явит им. Очи мои выну ко Господу, яко Той исторгнет от сети нозе мои. Призри на мя, и помилуй мя, яко единород и нищ есмь аз. Скорби сердца моего умножишася, от нужд моих изведи мя. Виждь смирение мое и труд мой, и остави вся грехи моя. Виждь враги моя, яко умножишася, и ненавидением неправедным возненавидеша мя. Сохрани душу мою, и избави мя, да не постыжуся, яко уповах на Тя. Незлобивии и правии прилепляхуся мне, яко потерпех Тя Господи. Избави Боже, Израиля от всех скорбей его.

Псалом 30:

На Тя Господи уповах, да не постыжуся во век, правдою Твоею избави мя, и изми мя. Приклони ко мне ухо Твое, ускори изъяти мя. буди ми в Бога Защитителя, и в дом прибежища, еже спасти мя. Яко Держава моя, и Прибежище мое еси Ты: и Имене Твоего ради наставиши мя, и препитаеши мя. Изведеши мя от сети сея, юже скрыша ми: яко Ты еси Защититель мой Господи. В руке Твои предложу дух мой: избавил мя еси Господи Боже истины. Возненавидел еси хранящия суеты вотще: аз же на Господа уповах. Возрадуяся и возвеселюся о милости Твоей, яко призрел еси на смирение мое, спасл еси от нужд душу мою. И неси мене затворил в руках вражиих, поставил еси на пространне нозе мои. Помилуй мя Господи, яко скорблю, смятеся яростию око мое, душа моя и утроба моя. Яко исчезе в болезни живот мой, и лета моя в въздыханиих: изнеможе нищетою крепость моя, и кости моя смятошася. от всех враг моих бых поношение, и соседом моим зело, и страх знаемым моим: видящии мя вон бежаша

от мене. Забвен бых яко мертв от сердца, бых яко сосуд погублен. Яко слышах гаждение многих живущих окрест: внегда собратися им вкупе на мя, прияти душу мою совещаща. Аз же на Тя Господи уповах, рех: Ты еси Бог мой. В руку Твоею жребии мои, избави мя из руки враг моих, и от гонящих мя. Просвети лице Твое на раба Твоего, спаси мя милостию Твоею. Господи, да не постыжуся, яко призвах Тя, да постыдятся нечестивии, и снидут во ад. Немы да будут устны льстивыя, глаголющия на праведнаго беззаконие, гордынею и уничижением. Коль многое множество благодати Твоя Господи, юже скрыл еси боящимся Тебе, соделал еси уповающим на Тя, пред сыны человеческими. Скрыеши их в тайне лица Твоего от мятежа человеческого: покрыеши их в крове от пререкания язык. Благословен Господь, яко удивил милость Свою во граде ограждения. Аз же рех во изступлении моем, отвержен есмь от лица очию Твоею: сего ради услышал еси глас молитвы моея, внегда воззвах к Тебе. Возлюбите Господа вси преподобнии его, яко истины взыскает Господь и воздаст излише творящим гордыню. Мужайтесь, и да крепится сердце ваше, вси уповаующии на Господа.

Псалом 90:

Живый в помощи Вышняго, в крове Бога Небеснаго водворится. Речет Господеви: Заступник мой еси, и Прибежище мое, Бог мой, и уповаю на Него. Яко Той избавит тя от сети ловчи, и от словесе мятежна. Плещма Своима осенит тя, и под криле Его надеешися. Оружием обыдет тя истина Его, не убоишися от страха ночнаго, от стрелы летящия во дни, от вещи во тьме преходящия, от сряща и беса полуденнаго. Падет от страны твоя тысяща, и тьма одесную тебе, к тебе же не приблизится. Обаче очима твоима смотриши, и воздаяние грешников узриши. Яко Ты Господи, Упование мое, Вышняго положил еси прибежище твое. Не приидет к тебе зло, и рана не приблизится телеси твоему. Яко ангелом Своим заповесть о Тебе, сохранить тя во всех путех твоих. На руках возмут тя, да не когда преткнеши о камень ногу твою. На аспида и василиска наступиши, и попереши льва и змия. Яко на Мя упова, и избавлю и: покрью и, яко позна Имя Мое: Воззовет ко Мне, и услышу его: с ним есмь в скорби, изму его: и прославлю его: Долготою дней исполню его, и явлю ему спасение Мое.

Слава, и ныне:

Аллилуиа, аллилуиа, аллилуиа, слава Тебе Боже. Трижды.

Господи помилуй, трижды.

Слава, и ныне:

С нами Бог, разумеите языцы, и покаряйтесь: яко с нами Бог.

Услышите до последних земли:

Яко с нами Бог:

Могущии покаряйтесь:

Яко с нами Бог:

Аще бо паки возможете, и паки побеждени будете:

Яко с нами Бог:

И иже аще совет совещаеете, разорит Господь:

Яко с нами Бог:

И слово, еже аще возглаголете, не пребудет в вас:

Яко с нами Бог:

Страха же вашего не убоимся, ниже смутимся.:

Яко с нами Бог:

Господа же Бога нашего Того освятим, и Той будет нам в страх:

Яко с нами Бог:

И аще на Него надеяся буду, будет мне во освящение:

Яко с нами Бог:

И уповая буду на Него, и спасуся Им:

Яко с нами Бог:

Се аз и дети, яже ми даде Бог:

Яко с нами Бог:

Людие ходящие во тьме, видеша свет велий:

Яко с нами Бог:

Живущии во стране и сени смертней, свет возсияет на вы:

Яко с нами Бог:

Яко Отроча родися нам, Сын, и дадеся нам:

Яко с нами Бог:

Егоже начальство бысть на раме Его:

Яко с нами Бог:

И мира Его несть предела:

Яко с нами Бог:

И нарицается Имя Его, Велика Совета Ангел:

Яко с нами Бог:

Чуден Советник:

Яко с нами Бог:

Бог крепок, Властитель, Начальник мира:

Яко с нами Бог:

Отец будущаго века:

С нами Бог, разумеите языцы, и покаряйтеся: яко с нами Бог.

Слава: И ныне: С нами Бог:

Таже вкупе: Яко с нами Бог.

И абие настоящия тропари.

Слава, и ныне:

День прешед, песнословлю Тя Святыи, вечер, прошу, с нощию ненаветен подаждь ми Спасе, и спаси мя.

Безплотное естество херувимское, немолчными песньми Тя славословят. Шестокрильная животная серафими, непрестанными гласы Тя превозносят: ангелов же вся воинства трисвятыми песньми Тя восхваляют. Прежде бо всех еси Сый Отец, и собезначальна имаши Твоего Сына: и равночестна носяи Духа жизни, Троицы являеши нераздельное.

Пресвятая Дево Мати Божия, и иже Слова самовидцы и слуги: пророк же и мученик вси лица, яко безсмертну имуще жизнь: о всех молитесь прилежно, яко вси есмы в бедах. Да прелести избавльшеся лукаваго, ангельскую вопием песнь: Святыи, Святыи, Святыи, Трисвятыи Господи, помилуй и спаси нас, аминь.

И абие низким гласом:

Верую во Единого Бога Отца Вседержителя, Творца небу и земли, видимым же всем и невидимым. ²И во Единого Господа Иисуса Христа, Сына Божия, Единородного, Иже от Отца Рожденнаго прежде всех век. Света от Света, Бога Истинна, от Бога Истинна, рожденна, не сотворенна, единосущна Отцу, Имже вся быша. ³Нас ради человек, и нашего ради спасения сшедшаго с небес, и воплотившагося от Духа Свята и Марии Девы, и вочеловечшася. ⁴Распятаго же за ны при Понтийстем Пилате, и страдавша, и погребена. ⁵И воскресшаго в третий день, по Писанием. ⁶И возшедшаго на небеса, и седяща одесную Отца. ⁷И паки грядущаго со славою судити живым и мертвым, Егоже Царствию не будет конца. ⁸И в Духа Святаго, Господа Животворящаго, Иже от Отца Исходящаго, Иже со Отцем и Сыном Спокланяема и Сславима, глаголавшаго пророки. ⁹Во едину святую, соборную и апостольскую Церковь. ¹⁰Исповедую едино крещение, во оставление грехов. ¹¹Чаю воскресения мертвых: ¹²И жизни будущаго века, аминь.

И абие, Пресвятая: вся глаголются по дважды, кроме Пресвятая Владычице, еже глаголется трижды:

Пресвятая Владычице Богородице, моли о нас грешных. (3)

Вся небесныя силы святых ангел и архангел молитесь о нас грешных. (2)

Святыи Иоанне пророче, и Предтече, и Крестителю Господа нашего Иисуса Христа, моли о нас грешных. (2)

Святии славнии апостоли, пророцы и мученицы, и вси святии, молитесь о нас грешных. (2)

Преподобнии и богоноснии отцы наши, пастырие и учителяе вселенныя, молитите о нас грешных. (2)

Зде же глаголется и святыи храма. (2)

Непобедимая, и непостижимая, и Божественная Сило Честнаго и Животворящаго Креста, не остави нас грешных. (2)

Боже, очисти нас грешных. (2)

Боже, очисти нас грешных, и помилуй нас. (2)

Трисвятое. Пресвятая Троице: Отче наш:

И поем тропари сия во глас 4

Рождество Твое, Христе Боже наш, / возсия миру свет разума: / в нем бо звездам служащии, / звездою учахуся, / Тебе кланятися Солнцу правды, / и Тебе ведети с высоты Востока: \ Господи, слава Тебе.

Господи помилуй, 40.

Слава, и ныне:

Честнейшую херувим:

Именем Господним благослови, отче.

Молитвами святых отец наших:

Аминь.

И молитву сию Великаго Василия:

Господи Господи, избавлей нас от всякия стрелы летящия во дни, избави нас и от всякия вещи во тьме преходящия. Приими жертву вечернюю рук наших воздеяние. Сподоби же нас и ночное поприще без порока прейти, неискушены от злых. И избави нас от всякаго смущения и боязни, яже от диавола нам прибывающия. Даруй душам нашим умиление, и помыслом нашим попечение, еже на страшнем и праведнем Твоем суде испытания. Пригвозди страху Твоему плоти наша, и умертви уды наша сущия на земли: да и сонным безмолвием просветимся зрением судеб Твоих. Отими же от нас всякое мечтание неподобное, и похоть вредну. Возстави же нас во время молитвы, утверждены в вере, и преспевающия в заповедех Твоих, благоволением, и благостию Единороднаго Сына Твоего: с Нимже благословен еси, с Пресвятым, и Благим, и Животворящим Твоим Духом, ныне и присно, и во веки веков, аминь.

И абие:

Приидите, поклонимся: трижды. И поклоны 3.

Псалом 50:

Помилуй мя Боже, по велицей милости Твоей и по множеству щедрот Твоих очисти беззаконие мое. Наипаче омой мя от беззакония моего, и от греха моего очисти мя. Яко беззаконие мое аз знаю, и грех мой предо мною есть выну. Тебе единому согреших, и лукавое пред Тобою сотворих, яко да оправдишися во

словесех Твоих, и победиши, внемга судити Ти. Се бо в беззаконных зачат есмь, и во гресех роди мя мати моя. Се бо истину возлюбил еси, безвестная и тайная премудрости Твоя явил ми еси. Окропиши мя иссопом, и очищуся: омыеши мя, и паче снега убелюся. Слуху моему даси радость и веселие, возрадуются кости смиренныя. Отврати лице Твое от грех моих, и вся беззакония моя очисти. Сердце чисто созижди во мне Боже, и дух прав обнови во утробе моей. Не отвержи мене от лица Твоего, и Духа Твоего Святаго не отыми от мене. Воздаждь ми радость спасения Твоего, и Духом Владычним утверди мя. Научу беззаконныя путем Твоим, и нечестивии к Тебе обратятся. Избави мя от кровей Боже, Боже спасения моего, возрадуется язык мой правде Твоей. Господи, устне мои отверзешу, и уста моя возвестят хвалу Твою. Яко аще бы восхотел еси жертвы, дал бых убо: всесожжения не благоволиши. Жертва Богу дух сокрушен: сердце сокрушенно и смиренно Бог не уничижит. Ублажи Господи, благоволением Твоим Сиона, и да созиждутся стены Иерусалимския. Тогда благоволиши жертву правды, возношение и всесожегаемая: тогда возложат на олтарь Твой тельцы.

Псалом 101:

Господи, услыши молитву мою, и вопль мой к Тебе да приидет. Не отврати лица Твоего от мене: вонуже аще день скорблю, приклони ко мне ухо Твое: вонуже аще день призову Тя, скоро услыши мя. Яко исчезоша яко дым дние мои, и кости моя яко сушило сосхошася. Уязвен бых яко трава, и исше сердце мое, яко забых снести хлеб мой. От гласа въздыхания моего, прильпе кость моя плоти моей. Уподобихся несыти пустынной, бых яко ночный вран на нырищи. Бдех, и бых яко птица, особящаяся на зде. Весь день поношаху ми врази мои, и хвалящии мя мною кленяхуся. Зане пепел яко хлеб ядох, и питие мое с плачем растворях. От лица гнева Твоего и ярости Твоя, яко вознес низвергл мя еси. Дние мои яко сень уклонишася, и аз яко сено иссох. Ты же Господи, во век пребываеши, и память Твоя в род и род. Ты воскрес ущедриши Сиона: яко время ущедрити его, яко прииде время. Яко благоволиша раби Твои камение его, и персть его ущедрят. И убоятся языцы Имене Господня, и вси царие земстии славы Твоя. Яко созиждет Господь Сиона, и явится во славе Своей. Призре на молитву смиренных, и не уничижи моления их. Да напишется сие в род ин, и людие зиждемии восхвалят Господа. Яко приниче с высоты святыя Своя, Господь с небесе на землю призре: услышати въздыхание окованных, разрешити сыны умерщвленных: Возвестити в Сионе Имя Господне, и хвалу Его во Иерусалиме. Внемга собратися людем вкупе, и царем еже работати Господеви. Отвеща ему на пути крепости его, умаление дней моих возвести ми. Не возведи мене в преполовение дней моих, в роде родов лета Твоя. В началех Ты Господи, землю основал еси, и дела руку Твоею суть небеса. Та погибнут, Ты же пребываеши: и вся яко риза обетшают, и яко одежду свиеши я, и изменятся. Ты же тойжде еси, и лета Твоя не оскудеют. Сынове раб Твоих вселятся, и семя их во век исправится.

Молитва Манассии царя Иудейска:

Господи Вседержителю, Боже отец наших, Авраамов, и Исааков, и Иаковль, и семене их праведнаго: сотворивый небо и землю со всею лепотою их, связавый

море словом повеления Твоего, заключивый бездну, и запечатствовавый ю страшным и славным именем Твоим, егоже вся боятся, и трепещут от лица силы Твоея яко непостоянно великолепие славы Твоея, и не стерпимъ гнев, еже на грешники прещения Твоего. Безмерна же и неизследованна милость обещания Твоего: Ты бо еси Господь Вышний, благоутробен. долготерпелив и многомилостив, и каяйся о злобах человеческих. Ты Господи, по множеству благости Твоея, обещал еси покаяние и оставление согрешившим Тебе, и множеством щедрот Твоих, определил еси покаяние грешником во спасение. Ты убо Господи Боже сил, не положил еси покаяние праведным, Аврааму и Исааку и Иакову, не согрешившим Тебе. Но положил еси покаяние на мне грешнем: зане согреших паче числа песка морского. Умножишася беззакония моя, Господи, умножишася беззакония моя: и несмь достоин воззрети, и видети высоту небесную от множества неправд моих. Слячен есмь многими узами железными, во еже не возвести главы моея, и несть ми ослабления: зане прогневах ярость Твою, и лукавое пред Тобою сотворих, не сотворивый воли Твоея, и не сохранивый повелений Твоих. И ныне приклоняю колена сердца, требуя от Тебе благости: согреших Господи, согреших, и беззакония моя аз вем: но прошу моляся, ослаби ми Господи, ослаби ми, и не погуби мене со беззаконьми моими. Ниже в век враждовав соблюдеши зол моих, ниже осудиши мя в преисподних земли. Зане Ты еси Боже, Бог кающихся, и на мне явиши всю благодать Твою, яко недостойна суща спасеши мя, по мнозей милости Твоей, и восхваляю Тя выну во днех живота моего: яко Тя поет вся сила небесная, и Твоя есть слава во веки веков, аминь.

Трисвятое. Поклоны три. Пресвятая Троице: **Отче наш:**

Кондак, глас 3.

Дева днесь Пресущественнаго раждает, / и земля вертеп Непреступному приносит: / ангели с пастырьми славословят, / волсви же со звездою путешествуют: / нас бо ради родися отроча младо, Превечный Бог.

Господи помилуй, **40.**

Слава, и ныне:

Честнейшую херувим:

Именем Господним благослови, отче.

Молитвами святых отец наших:

Аминь.

И молитву: Владыко Боже Отче Вседержителю, Господи, Сыне Единородный Иисусе Христе, и Святыи Душе, Едино Божество, Едина Сила, помилуй мя грешнаго: и имиже веси судьбами, спаси мя недостойнаго раба Твоего, яко благословен еси во веки веков, аминь.

Приидите, поклонимся: трижды.

Псалом 69:

Боже, в помощь мою вонми, Господи, помощи ми потщися. Да постыдятся и посрамятся ищущи душу мою. Да возвратятся вспять, и постыдятся хотящие ми злая. Да возвратятся абие стыдящися, глаголющие ми: благоже, благоже. Да возрадуются и возвеселятся о Тебе вси ищущи Тебе Боже: и да глаголют выну, да возвеличится Господь, любящий спасение Твое. Аз же нищ есмь и убог, Боже помози ми: Помощник мой, и Избавитель мой еси Ты, Господи не закосни.

Псалом 142:

Господи, услыши молитву мою, внуши моление мое во истине Твоей, услыши мя в правде Твоей: И не вниди в суд с рабом Твоим, яко не оправдится пред Тобою всяк живой. Яко погна враг душу мою, смирил есть в землю живот мой: Посадил мя есть в темных, яко мертвыя века. И уны во мне дух мой, во мне смятеся сердце мое. Помянух дни древния, поучихся во всех делех Твоих, в творениях руку Твоею поучахся. Воздох к Тебе руже мои: душа моя яко земля безводная Тебе. Скоро услыши мя Господи, исчезе дух мой: не отврати лица Твоего от мене, и уподоблюся низходящим в ров. Слышану сотвори мне заутра милость Твою, яко на Тя уповах. Скажи мне Господи путь, вонже пойду, яко к Тебе взях душу мою. Изми мя от враг моих, Господи к Тебе прибегах, научи мя творити волю Твою, яко Ты еси Бог мой. Дух Твой Благий наставит мя на землю праву. Имене Твоего ради Господи, живиши мя, правдою Твоею изведеши от печали душу мою: И милостию Твоею потребиши враги моя, и погубиши вся стужающия души моей, яко аз раб Твой есмь.

Слава в вышних Богу, и на земли мир, в человецех благоволение. Хвалим Тя, благословим Тя, кланяем Ти ся, славословим Тя, благодарим Тя, великия ради славы Твоея. Господи Царю Небесный, Боже Отче Вседержителю, Господи Сыне Единородный Иисусе Христе, и Святыи Душе: Господи Боже, Агнче Божий, Сыне Отець, вземляй грех мiра, помилуй нас: вземляй грехи мiра, прими молитву нашу, седяи одесную Отца, помилуй нас. Яко Ты еси Един Свят, Ты еси Един Господь, Иисус Христос, в славу Бога Отца, аминь.

На всяку ночь благословлю Тя, и восхвалю Имя Твое во веки, и в век века.

Господи, прибежище был еси нам в род и род. Аз рех: Господи, помилуй мя, исцели душу мою, яко согреших Тебе. Господи, к Тебе прибегах, научи мя творити волю Твою, яко Ты еси Бог мой: яко у Тебе источник живота, во свете Твоем узрим свет. Пробави милость Твою ведущим Тя.

Сподоби Господи в ночь сию без греха сохранитися нам. Благословен еси Господи, Боже отец наших, и хвально, и прославлено Имя Твое во веки, аминь.

Буди Господи, милость Твоя на нас, якоже уповахом на Тя. Благословен еси Господи, научи мя оправданием Твоим. Благословен еси Владыко, вразуми мя оправданием Твоим. благословен еси Святыи, просвети мя оправданием Твоим. Господи, милость Твоя во век, дел руку Твоею не презри. Тебе подобает хвала, Тебе подобает пение, Тебе слава подобает, Отцу, и Сыну, и Святому Духу, ныне и присно и во веки веков, аминь.

По Слава в вышних: исходим в притвор, поюще:

На литии стихиры самогласны, глас 1.

[Иоанна монаха:]

Небо и земля днесь пророчески да возвеселятся, / ангели и человецы духовно да торжествуют: / яко Бог во плоти явися, / сущим во тьме и сени сидящим, / рождейся от Девы, / вертеп и ясли прияша Того: / пастырие чудо проповедуют, / волсви от восток в Вифлеем дары приносят. / Мы же хвалу недостойными устнами, / ангельски Тому принесем: / слава в вышних Богу, / и на земли мир: / прииде бо чаяние языков, пришед спасе нас от работы вражия.

Небо и земля днесь совокупишася, / рождшуся Христу: / днесь Бог на землю прииде, / и человек на небеса взыде: / днесь видим есть плотию, естеством невидимый, / человека ради. / Сего ради и мы славословяще возопиим Ему: / слава в вышних Богу, и на земли мир: / дарова бо пришествие Твое, Спасе наш, слава Тебе.

Слава в вышних Богу, / в Вифлееме слышу от безплотных днесь, / на земли мир благоволившему быти: / ныне Дева небес ширши. / Возсия бо Свет омраченным, / и смиренныя возвыси ангельски поющия: / слава в вышних Богу.

По образу и по подобию, истлевша преступлением видево Иисус, / приклонив небеса сниде, / и вселися во утробу Девственную неизменно, / да в ней истлевшаго Адама обновит, зовуща: / слава явлению Твоему, Избавителю мой и Боже.

Слава, глас 5:

[Иоанна монаха:]

Волсви персидстии царие, / познавше яве на земли рождшагося Царя Небеснаго, / от светлыя звезды водими, / достигоша в Вифлеем, / дары носяще избранныя, / злато, и ливан, и смирну, / и падше поклонишася: / видеша бо в вертепе Младенца лежаща Безлетнаго.

И ныне, гл.6:

[Германово:]

Ликуют ангели вси на небеси, / и радуются человецы днесь: / играет же вся тварь рождшагося ради / в Вифлееме Спаса Господа: / яко всякая лесь идольская преста, / и царствует Христос во веки.

На стиховне стихиры, самогласны, глас 2.

[Германово:]

Велие и преславное чудо совершися днесь: / Дева раждает и утроба не истлевет: / Слово воплощается и Отца не отлучается. / Ангели с пастырьми славят, / и мы с ними вопием: / слава в вышних Богу, и на земли мир.

Глас 3:

Стих: Рече Господь Господеви моему: седи одесную Мене.

Днесь раждает Дева Творца всех: / Едем приносит вертеп, / и звезда показывает Христа, / Солнца сущим во тьме. / С дары волсви поклонися, / верою просвещаемы: / и пастырие видеша чудо, / ангелом воспевающим и глаголющим: / слава в вышних Богу.

Стих: Из чрева прежде денницы родих Тя: клялся Господь, и не раскается.

[Анатолиево:]

Господу Иисусу рождшуся в Вифлееме Иудейстем, / от восток пришедше волсви, / поклонися Богу вочеловчшуся, / и сокровища своя усердно отверзши, / дары честныя приношаху: / искушено злато, яко Царю веков: / и ливан, яко Богу всех: / яко тридневному же мертвецу, / смирну Безмертному. / Все языцы приидите поклонимся Рождшемуся, спасти души наша.

Слава, глас 4: [Иоанна монаха:]

Веселися Иерусалиме, / торжествуйте вси любящии Сиона: / днесь временный разрешился союз осуждения Адамова, / рай нам отверзся, / змий упразднися: / юже бо прельсти первее, / ныне узре Содетелеву бывшу Матерь. / О глубина богатства, и премудрости, / и разума Божия! / Яже исходатаивши смерть всей плоти, / греховный сосуд, спасения начало бысть миру всему, / Богородицы ради. / Младенец бо рождается из Нея Всесовершенный Бог, / и Рождеством девство печатствует: / пленицы греховныя разрешая пеленами, / и младенства ради, / Евины врачует яже в печалех болезни. / Да ликовствует убо вся тварь, / и да играет: / обновити бо ю прииде Христос, и спасти души наша.

И ныне, глас тойже:

В вертеп вселился еси Христе Боже, / ясли Тя восприяша, / пастырие же и волсви поклонися. / Тогда убо пророческая исполнися проповедь, / и ангельския силы дивляхуся, / вопиюще и глаголюще: / слава схождению Твоему, едине Человеколюбче.

Таже, Ныне отпускаеши: **Трисвятое. По Отче** наш:

Тропарь, глас 4:

Рождество Твое Христе Боже наш, / возсия миру свет разума: / в нем бо звездам служащии, / звездою учахуся, / Тебе кланялися Солнцу правды, / и Тебе ведети с высоты Востока: / Господи слава Тебе.

Таже, Буди имя Господне благословено от ныне и до века: **трижды.**

Благословлю Господа на всякое время:

Конец: **Не** лишатся всякаго блага. **Таже, чтения праздника, в толковании еже от Матфея, Слово 4. Посем, Слава в вышних Богу: и екса псалмы, по обычаю.**

НА УТРЕНИ,

на Бог Господь, тропарь праздника, трижды.

По 1_м стихословии седален, глас 1.

Подобен: Гроб Твой Спасе:

В яслех нас ради безсловесных положился еси, / долготерпеливе Спасе, / младенствовав волею, / пастырие же Тя воспеша со ангелы, зовуще: / слава и хвала на земли Рожденному / и Обожившему земнородных существо, / Христу Богу нашему.

Слава, и ныне, тойже, и чтение.

По 2_м стихословии седален, глас 3.

Подобен: Красоте девства:

Превечнаго и Непостижимаго, / Соприсносущнаго Невидимому Отцу, / во утробе плотски носила еси Богородице, / Едино и неслиянное Троицы Божество. / просия благодать Твоя в мире, Всепетая, / темже непрестанно вопием: / радуйся Чистая Дево Мати.

Слава, и ныне, тойже, и чтение.

Величание:

Величаем Тя Живодавче Христе, нас ради ныне плотию рождшагося от Безвестных и Пречистых Девы Марии.

Псалом избранный:

Воскликните Господеву вся земля.

Величаем Тя Живодавче Христе, нас ради ныне плотию рождшагося от Безвестных и Пречистых Девы Марии.

Бог же наш на небеси и на земли, вся елика восхоте, сотвори.

Величаем Тя Живодавче Христе, нас ради ныне плотию рождшагося от Безвестных и Пречистых Девы Марии.

Слава, и ныне, Аллилуиа, аллилуиа, аллилуиа, слава Тебе Боже. Трижды.

Величаем Тя Живодавче Христе, нас ради ныне плотию рождшагося от Безвестных и Пречистых Девы Марии.

По полиелеи седален, глас 4:

Подобен: Удивися Иосиф:

Приидите видим вернии, / где родися Христос: / последуем прочее, / аможе идет звезда, с волхвы восточными цари: / Егоже ангели поют непрестанно тамо, / пастырие свирают песнь достойную, / слава в вышних глаголюще, / днесь в вертепе Рождшемуся от Девы и Богородицы, / в Вифлееме Иудейстем.

Слава, и ныне, той же.

Степенна, глас 4. Антифон 1-й, их же стихи повторяюще поем:

От юности моя / мнози борют мя страсти, / но Сам мя заступи, / и спаси Спасе мой.

Ненавидящий Сиона, / посрамитесь от Господа, / яко трава бо огнем / будете изсохше.

Слава: / Святым Духом / всяка душа живится, / и чистотою возвышается, / светлеется Троическим Единством священнотайне.

И ныне, той же.

Прокимен, глас 4:

Прокимен: Из чрева прежде денницы родих Тя, клятся Господь и не раскается.

Стих: Рече Господь Господеви моему: седи одесную мене дондеже положу враги Твоя подножие ног Твоих.

Всякое дыхание да хвалит Господа.

Хвалите Бога во святых Его:

Евангелие Матфея, зач. 2.

Рѣтвѡ іисъ хрѣтѡво сіце бѣ: ѡврѣченнѣй во бѣвши мѣри егѡ мѣри іѡсифѡви, прѣжде даже не снѣтисѧ ѿ ма, ѡврѣтесѧ ѿ ма въ чрѣвѣ ѡ дѣа сѣа. Іѡсифъ же мѣжъ еѡ, прѣвнѣ сѣй ѿ не хотѣ еѡ ѡбличѣти, восхотѣ тѣй пѣстѣти ю. Сѣа же еѡ помыслившѡ, сѣ, ѡггѣль гдѣнь во снѣ ѡвѣсѧ еѡ, глагола: іѡсифе, сѣне дѣдовъ, не ѡубѡйсѧ прѣѣти мѣрамъ женѣ твоѣ: рѡждшесѧ въ неѣ, ѡ дѣа еѣтъ сѣа: родѣтъ же сѣа, ѿ наречѣши ѿ ма еѡ іисъ: тоѣ во сѣсѣтъ люди своѡ ѡ грѣхъ ѿхъ. Сѣе же всѣ бѣсѣтъ, да свѣдетсѧ рѣченное ѡ гдѣ прѣрѡкомъ, глаголющимъ: сѣ, дѣа во чрѣвѣ прѣѣметъ ѿ родѣтъ сѣа, ѿ наречѣтъ ѿ ма еѡ еѡманѣиль, еѣже еѣтъ сказаемо: сѣ нами бѣтъ. **В**остѣвъ же іѡсифъ ѡ сѣа, сотвори ѿкоже повелѣ еѡ ѡггѣль гдѣнь, ѿ прѣѣтъ женѣ своѡ, ѿ не знаѣше еѡ, дѡндеже роди сѣа своѣгѡ пѣрвенца, ѿ наречѣ ѿ ма еѡ іисъ.

По 50_м псалме вместо Молитвами: поем:

Слава: Всяческая днесь радости исполняются, Христос родися от Девы.

И ныне: Всяческая днесь радости исполняются, Христос родися в Вифлееме.

Таже, Помилуй мя Боже:

И стихира, глас 6:

Слава в вышних Богу, / и на земли мир, / днесь восприемлет Вифлеем Седящего присно со отцем, / днесь ангели Младенца Рожденного боголепно славословят, / слава в вышних Богу, / и на земли мир, / в человецех благоволение.

Канона два,

ирмосы обою канонов по дважды: тропари же на 12.

Канон первый, творение Кир Космы, егоже краестрочие:

Христос вочеловечився, еже бе, Бог пребывает.

Глас 1.

Песнь 1.

Ирмос: Христос рождается, славите. / Христос с небес, срящите. / Христос на земли, возноситеся. / Пойте Господеву вся земля / и веселием воспойте, людие, / яко прославися.

Истлевша преступлением, по Божию образу бывшего, всего тления суша, лучшая отпадша Божественная жизни паки обновляет Мудрый Содетель, яко прославися.

Видев Зиждитель гиблема человека, руками егоже созда, приклонив небеса сходит, сего же от Девы Божественная Чистая, всего осуществляет, воистинну воплотиться, яко прославися.

Мудрость, Слово и Сила, Сын сый Отчий, и Сияние, Христос Бог, сил утаився, елико премірных, и елико на земли, и вочеловечься обновил есть нас, яко прославися.

Другий канон. Творение кир Иоанна, глас тойже.

Краегранесие: Добрословными пенми песни сия славят Сына Божия, человек ради раждаема на земли, и решаща многостенящие скверны міра. О Царю, певцев спаси от бед.

Ирмос: Спасе люди чудодействуяй Владыка, / мокрую моря волну оземлив дравле: / волею же рождся от Девы, / стезю проходну Небесе полагает нам, / Егоже по существу, / равна же Отцу и человеком славим.

Изнесе чрево Священное Слово, яве неопально живописанное купиною, смешена зраком человечесим Бога, Евы окаянную утробу клятвы древняя разрешающее горькия, егоже земнии славим.

Показа звезда прежде солнца слово пришедшее уставити грехи, волхвом яве во убозем вертепе, милостиваго Тебе пеленами повита: егоже радующесе видяху самого и Человека и Господа.

Катавасия : Христос рождается, славите. / Христос с небес, срящите. / Христос на земли, возноситеся. / Пойте Господеви вся земля / и веселием воспойте, людие, / яко прославися.

Песнь 3.

Ирмос: Прежде век от Отца рожденному нетленно Сыну / и в последняя от Девы Воплощенному безсеменно / Христу Богу возопиим: / вознесый рог наш, / Свят еси, Господи.

Иже духновения причащся лучшаго Адам перстный, и к тлению поползся женскою лестию, Христа от жены видя, вопиет: иже мене ради по мне быв, свят еси Господи.

Сообразен брэнному умалению, растворением, Христе, быв, и причастием плоти горшия, подав Божественнаго естества, землен быв, и пребыв Бог, и возвысивый рог наш, свят еси Господи.

Вифлееме веселися, князей Иудовых сый царь: Израиля бо пасый, на рамах херувимских, из тебе пройде Христос яве: и вознесый рог наш, над всеми воцарися.

Ин.

Ирмос: Призри на пения рабов Благодетелю, / врага смиряя вознесенную гордыню: / носий же, Всевидче, / греха превышши непоколеблемо, / утвержденные, Блаже, / певцы основанием веры.

Невесты Пречистыя пребогатое Рождество, видети паче ума сподобився лик свирающих, преклоняшеса странным образом: чин же поющих безплотных Царя Христа, безсеменно Воплощшагося.

Высотую царствуяй небес, милосердием совершает о нас из Безвестныя отроковицы, невестствен Сый прежде: но послежде слово одобелевшо плотию, да падшаго к Себе привлечет перевозданнаго.

Катавасия : Прежде век от Отца рожденному нетленно Сыну / и в последняя от Девы Воплощенному безсеменно / Христу Богу возопиим: / вознесый рог наш, / Свят еси, Господи.

Ипакои, глас 8:

Начаток языков, небо Тебе принесе, лежащему Младенцу во яслех, звездою волхвы призывавый, яже и ужасаше, не скиптри и престоли, но последняя нищета: что бо худше вертепа; что же смиреннее пелен? в нихже просия Божества Твоего богатство, Господи слава Тебе.

Песнь 4.

Ирмос: Жезл из корене Иессеова, и цвет от него, Христе, / от Девы прозябл еси, из горы хвальный приосененныя чащи, / пришел еси воплощся, / от Неискусомужныя, / Невещественный Боже: / слава силе Твоей, Господи.

Егоже древле прорече Иаков, языков ожидание Христе, от колена Иудова возсиял еси, и силу Дамаскову, самарийскую же корысть пришел еси испроврещи, леств пременяя в веру боголепну: слава силе Твоей, Господи.

Волхва древле Валаама словесы ученики, мудрыя звездоблюстителы, радости исполнил еси, звезда от Иакова возсияв, Владыко, языков начаток вводимый, приял же еси яве: слава силе Твоей, Господи.

Яко на руно, во чрево Девы сшел еси дождь, Христе, и яко капли на землю каплющыя. Ефиопия и Фарсис, и Аравитстии острови же, Сава, мидов всю землю держащии, припадоша Тебе Спасе: слава силе Твоей, Господи.

Ин.

Ирмос: Рода чловеча обновление, / древле поя пророк Аввакум предвозвещает, / видети неизреченно сподобився образ: / младый Младенец бо / из горы Девы изыде, / людей во обновление Слово.

Равен произыде человеком Вышний, волею плоть приим от Девы, яд очистити змиевы главы, приводя вся к свету живоносному, Бог сый, от врат безсолнечных.

Языцы иже древле тлею погружени, пагубы зело вражия убежавше, возносят руки с похвальными песньми, единого чтуще Христа яко Благодетеля, к нам милостивно пришедшаго.

Из корене израстши Иессеова Дево, уставы прешла еси человеческого существа, Отчее рождши Превечное Слово, яко благоволи Сам запечатанную утробу проити истощанием странным.

Катавасия: Жезл из корене Иессеова, и цвет от него, Христе, / от Девы прозябл еси, из горы хвальный приосененныя чащи, / пришел еси воплощся, / от Неискусомужныя, / Невещественный Боже: / слава силе Твоей, Господи.

Песнь 5.

Ирмос: Бог сый мира, Отец щедрот, / великаго совета Твоего Ангела, / мир подавающа, послал еси нам: / тем богоразумия к свету наставльшеся, / от нощи утренююще, славословим Тя, / Человеколюбче.

В рабех кесаревым повелением написатися покорься, и нас рабы сущыя врага и греха, свободил еси Христе: весь же по нам обнищав, и перстнаго от самага единения и общения богосоделал еси.

Се Дева, якоже древле рече, во чреве приемши родила есть Бога вочеловечшася, и пребывает Дева. Еяже ради примирившеся Богу грешнии, Богородицу сущую воистинну, вернии, воспоим.

Ин.

Ирмос: Из ноши дел омраченныя прелести, / очищение нам Христе, / бодренно ныне совершающим песнь / яко Благодетелю, / прииди, подавая удобну стезю, / по нейже востекающе, обрящем славу.

Лютую вражду, юже к нам, Владыка отсекая, паки плотским пришествием, да держащаго разрушит душетлеющаго, мир сочетая с невещественными существы, положив приступна Рождшаго твари.

Людие видеша древле омраченнии, по днех свет вышня светлости: языки же Богу наследие Сын приносит, подая тамо неизреченную благодать, идеже множайший процвете грех.

Катавасия: Бог сый міра, Отец щедрот, / великаго совета Твоего Ангела, / мир подавающа, послал еси нам: / тем богоразумия к свету наставльшися, / от ноши утренююще, славословим Тя, / Человеколюбче.

Песнь 6.

Ирмос: Из утробы Иону младенца изблева / морской зверь, якова прият: / в Деву же всельшееся Слово, / и плоть приемшее, пройде сохраняющее нетленну, / егоже бо не пострада истления, / Рождшую сохрани неврежденну.

Прииде воплощься Христос Бог наш из чрева, егоже Отец прежде денницы раждает: правления же держа пречистых сил, в яслех скотиях возлежит, и пеленами повивается, разрешает же многоплетенныя пленицы прегрешений.

Юно из Адама Отроча смешения, родися Сын, и верным дадеся, будущаго века сей есть Отец, и Начальник, и нарицается великаго совета Ангел: сей крепок Бог есть, и держай областию всю тварь.

Ин.

Ирмос: Обитая Иона / в преисподних морских, / приити моляшися и бурю утолити: / унзен же аз мучащаго стрелою, / Христу воспеваю, зол Губителю, / скоро приити Тебе к моей лености.

Иже бе исперва к Богу, Бог Слово, ныне утверждает немощное древле: видевох сохранити еже по нам существо, имже себе вторым общением, абие проявляя страстей свободное.

Грядет нас ради из Авраамлих чресл, темнопадшыя во мраце прегрешений, сыны воздвигнути долу поникших, иже во свете обитай и яслех, чрез достояние, ныне благоволив в человеческое спасение.

Катавасия: Из утробы Иону младенца изблева / морской зверь, якова прият: / в Деву же всельшееся Слово, / и плоть приемшее, пройде сохраняющее нетленну, / егоже бо не пострада истления, / Рождшую сохрани неврежденну.

Кондак, глас 3.

Дева днесь Пресущественнаго раждает, / и земля вертеп Непреступному приносит: / ангели с пастырьми славословят, / волсви же со звездою путешествуют: / нас бо ради родися отроча младо, Превечный Бог.

Икос:

Едем Вифлеем отверзе, приидите видим, пищу в тайне обретохом: приидите, примем сушая райская внутри вертепа. тамо явися корень ненапоен, прозябая отпущение: тамо обретесе кладезь неископан, из негоже Давид пити древле возжадася. тамо Дева рождши Младенца, жажду устави абие Адамову и Давидову. Сего ради к нему идем, где родися Отроча младо, Превечный Бог.

Песнь 7.

Ирмос: Отроцы благочестию совоспитани, / злочестиваго веления небрегше, / огненнаго прещения не убояшася, / но посреди пламене стояще пояху: / отцев Боже благословен еси.

Пастырие свиряюще, ужасно светоявление получиша: слава бо Господня облиста их, и ангел, воспойте, вопия: яко родися Христос, отцев Бог Благословенный.

Внезапу с словом ангеловым Небесная воинства, слава, вопияху, Богу в Вышних, на земли мир, в человецех благоволение: Христос возсия, отцев Бог Благословенный.

Глагол что сей, рекоша пастырие, пришедше увидим бывшее, Божественнаго Христа; Вифлеема же дошедше, с Рождшею поклоняхуся, воспевающе: отцев Боже, благословен еси.

Ин.

Ирмос: Всецаря любовию уловлении, / отроцы укориша безчисленно / ярящася мучителя злобное языковредие: / имже повинуся огонь многий / Владыце глаголющим: / во веки благословен еси.

Слуги убо неистовно поपालает, спасает же всепалаящая со страхом юныя, седмочисленным разжжением возвышена: ихже венча пламень, независтно Господу подающе благочестия ради росу.

Помощниче Христе человеком, противное гадание, воплощение неизглаголанное имей, посрамил еси, богатство обожения носяй вообрази ныне, егоже ради упованием, свыше в преисподний приидохом мрак.

Зле неудержанно возвышаемый, нечестно бесящийся от развращения мира, низложил еси всемогущи грех, яже привлече прежде, днесь же от сетей спасаеши, воплощься волею благодетелю.

Катавасия: Отроцы благочестию совоспитани, / злочестиваго веления небрегше, / огненнаго прещения не убояшася, / но посреди пламене стояще пояху: / отцев Боже благословен еси.

Песнь 8.

Ирмос: Чуда преестественнаго, / росодательная изобрази пещь образ, / не бо яже прият палит юныя, / яко ниже огонь Божества Девы, в Ньюже вниде утробу. / Тем воспевающе воспоем: / да благословит тварь вся Господа, / и превозносит во вся веки.

Влечет Вавилоня дщи отроки плененныя Давидовы от Сиона к себе: дароносицы же слет волхвы дети, Давидове богоприятней Дщери молящияся. Тем воспевающе воспоем: да благословит тварь вся Господа, и превозносит во вся веки.

Органы уклониша плачевныя песни, не пояху бо в земли чуждей отроцы Сионовы: Вавилонскую же разрешает лещь всю, и мусикийския составы, в Вифлееме возсияв Христос. Тем воспевающе воспоем: да благословит тварь вся Господа, и превозносит во вся веки.

Корысти Вавилон царства Сионя, и плененное богатство прият: сокровища же Христос в Сион сего, и цари звездою наставляя звездоблюстителю влечет. тем воспевающе воспоем: да благословит тварь вся Господа, и превозносит во вся веки.

Ин.

Ирмос: Утробу неопально образуют отроковицы, / иже в ветсем опаляеми юноши, / преестественно Раждающую, запечатленну: / обоя же содевающи / чудодейство едино, / люди к пеню возставляет благодать.

Пагубы убежавше, еже обожитися прелестию, непрестанно поет изливавшегося слова, юношески вся с трепетом тварь, неславу хвалу боящихся приносит, тленна сущи, аще и мудре терпяше.

Грядеши заблуждшее на пажить обращая цветотворную, из пустынных холмов, языков востание, человеческое естество, силу нужную человекоубийцы угасити, муж же явився и Бог промышлением.

Катавасия: Чуда преестественнаго, / росодательная изобрази пещь образ, / не бо яже прият палит юныя, / яко ниже огонь Божества Девы, в Ньюже вниде утробу. / Тем воспевающе воспоем: / да благословит тварь вся Господа, / и превозносит во вся веки.

На 9_й песни вжигают свечи братия.

Честнейшую не поем, но поем припев праздника:

Величай душе моя, **Честнейшую** и **Славнейшую** горних воинств, **Деву** **Пречистую** Богородицу.

И ирмос: Таинство странное вижу и преславное: / небо, вертеп: / престол херувимский, Деву: / ясли, вместилище, / в нихже возлеже / Невместимый Христос Бог, / Егоже воспевающе величаем.

Таже второй лик поет тойже припев и ирмос. И прочих шесть припевов припеваем на кийждо тропарь по единожды:

Величай душе моя, от Девы Бога плотию Рождшася.

Величай душе моя, в вертепе рождшагося Царя.

Изрядное течение зряще волсви, необычныя новыя звезды новосияющия, небеса просвещающия, Христа Царя знаменуют, на земли рождшагося в Вифлееме, на спасение наше.

Величай душе моя, от волхвов Бога покланяемаго.

Величай душе моя, от звезды волхвом Возвещеннаго.

Новорожденное, волхвом глаголющим, Отроча Царь, егоже звезда яви, где есть; тому бо поклонитися приидохом: яряся Ирод смущашеся, Христа убити богоборец шатаяся.

Величай душе моя, Чистую Деву, и Едину Богородицу, рождшую Христа Царя.

Волсви и пастырие приидоша поклонитися Христу, рождшемуся в Вифлееме граде.

Испыта Ирод время звезды, еяже вождением волсви в Вифлееме покланяхуся Христу с дары: еюже ко отечеству наставляеми, лютаго детоубийцу оставиша поругана.

Таже первый лик поет втораго канона припев:

Днесь Дева раждает Владыку внутрь вертепа.

И ирмос: Любити убо нам, / яко безбедное страхом удобее молчание, / любовию же Дево песни ткати спротяженно сложенные, / неудобно есть: / но и Мати силу, / елико есть произволение, даждь.

Днесь Владыка раждается яко Младенец от Матере Девы.

Днесь пастырие видят Спаса пеленами обвита, и лежаща во яслех.

Днесь Владыка рублищем пеленается неосязный, яко младенец.

Днесь всякая тварь веселится и радуется, яко Христос родися от Девы Отроковицы.

Образы неслетлы, и сени приведены, о Мати Чистая! видевшие слова нова Явльшагося от врат заключенных: мнящии же истинную светлость, достойно Твою благословим утробу.

Небесныя силы Рождшагося Спаса Господа и Владыку возвещают міру.

Величай душе моя, Триипостаснаго и Нераздельнаго Божества державу.

Величай душе моя, Избавльшую нас от клятвы.

Желание получивше, и Божия пришествия христокраснии людие сподобльшесе, ныне утешаются паки бытием, яко живоносну благодать даеши Дево Чистая, поклонитися славе.

Катавасия: Таинство странное вижу и преславное: / небо, вертеп: / престол херувимский, Дева: / ясли, вместилище, / в нихже возлеже / Невместимый Христос Бог, / Егоже воспевающе величаем.

Светилен:

Посетил ны есть свыше Спас наш, Восток востоков, и сущии во тьме и сени обретохом истину, ибо от Девы родися Господь. **Трижды.**

На хвалитех поем стихиры самогласны, 4:

Андреа Иерусалимскаго. Глас 4:

Веселитесь праведнии, / небеса радуйтесь, / възиграйте горы, Христу рождшуся: / Дева сedit херувимов подобящися, / носяще в недрах Бога Слова Воплощенна: / пастырие Рожденному дивятся: / волсви Владыце дары приносят: / ангели воспевающе глаголют: / непостижиме Господи, слава Тебе.

Богородице Дево, / Рождшая Спаса, / упразднила еси первую клятву Евину: / яко Мати была еси благоволения Отча, / носящи в недрах Божие Слово Воплощенное. / Не терпит тайна испытания. / Верую единою сию вси славим, / зовуще с Тобою и глаголюще: / неизреченне Господи, слава Тебе.

Приидите воспоем Матерь Спасову, / по Рождестве паки явльшуюся Дева: / Радуйся, граде одушевленный Царя и Бога, / в немже Христос пожив спасение содела. / С Гавриилом воспоем, / с пастырьми прославим, зовуще: / Богородице, моли из Тебе Воплощеннаго спастися нам.

Отец благоизволи, / Слово плоть бысть, / и Дева роди Бога вочеловечшася, / звезда возвещает, волсви поклоняются, / пастырие чудятся, / и тварь радуется.

Слава, глас 6. Германово.

Егда время еже на землю пришествия Твоего, / первое написание вселенней бысть: / тогда восхотел еси человекоев написати имена, / верующих Рождеству Твоему. / Сего ради таковое повеление от кесаря возгласися: / вечнаго бо Твоего Царствия безначальное Рождеством Твоим обновися. / Тем Тебе приносим и мы паче именнаго даннослова, / православнаго богатство богословия, / яко Богу и Спасу душ наших.

И ныне, глас 2. Иоанна монаха.

Днесь Христос в Вифлееме раждается от Девы: / днесь Безначальный начинается, / и Слово воплощается: / силы Небесныя радуются, / и земля с человеки веселится: / волсви Владыце дары приносят: / пастырие Рожденному дивятся. / Мы же непрестанно вопием: / слава в вышних Богу, и на земли мир, в человецех благоволение.

Славословие великое. По трисвятом тропарь праздника.

Тропарь, глас 4:

Рождество Твое Христе Боже наш, / возсия миру свет разума: / в нем бо звездам служащий, / звездою учахуся, / Тебе кланялися Солнцу правды, / и Тебе ведети с высоты Востока: / Господи слава Тебе.

Ектении, и отпуст.

И знаменает игумен святым елеем братию, от кандила, еже пред праздничною иконою. Поющим нам стихиру самогласну праздника. **И час 1. На 1_м часе тропарь праздника. По трисвятом кондак праздника. И прочая. И совершенный отпуст.**

В сий день бывает литургия порану, труда ради бденнаго.

**НА ЛИТУРГИИ:
АНТИФОНЫ ПРАЗДНИКА.**

Антифон 1-й, глас 2

Исповемся Тебе Господи, всем сердцем моим, повем вся чудеса Твоя.

Припев: Молитвами Богородицы Спасе спаси нас.

В совете правых и сонме, велия дела Господня.

Припев: Молитвами Богородицы Спасе спаси нас.

Изыскана во всех волях Его.

Припев: Молитвами Богородицы Спасе спаси нас.

Исповедание и великолепие дело Его, и правда Его пребывает в век века.

Припев: Молитвами Богородицы Спасе спаси нас.

Слава, и ныне:

Припев: Молитвами Богородицы Спасе спаси нас.

Антифон 2-й, глас 2.

Блажен муж бояйся Господа, в заповедех Его восхощет зело.

Припев: Спаси ны Сыне Божий, рождейся от Девы, поюция Ти: аллилуиа.

Сильно на земли будет семя его, род правых благословится.

Припев: Спаси ны Сыне Божий, рождейся от Девы, поюция Ти: аллилуиа.

Слава и богатство в дому его, и правда его пребывает в век века.

Припев: Спаси ны Сыне Божий, рождейся от Девы, поюция Ти: аллилуиа.

Возсия во тме свет правым, милостив и щедр и праведен.

Припев: Спаси ны Сыне Божий, рождейся от Девы, поюция Ти: аллилуиа.

Слава, и ныне: Единородный Сыне:

Антифон 3, глас 4.

Рече Господь Господеву моему: седи одесную Мене.

Тропарь, глас 4:

Рожество Твое Христе Боже наш, / возсия миру свет разума: / в нем бо звездам служащий, / звездою учахуся, / Тебе кланятся Солнцу правды, / и Тебе ведети с высоты Востока: / Господи слава Тебе.

Дондеже положу враги Твоя подножие ног Твоих.

Тропарь:

Жезл силы послет Ти Господь от Сиона, и господствуй посреде врагов Твоих.

Тропарь:

С Тобою начало в день силы Твоея во светлостех святых Твоих.

Тропарь:

Входное:

Из чрева прежде денницы родих Тя, клятса Господь и не раскается: Ты Иерей во век по чину Мелхиседекову.

Тропарь праздника.

Слава, и ныне, кондак:

Кондак, глас 3.

Дева днесь Пресущественнаго раждает, / и земля вертеп Непреступному приносит: / ангели с пастырьми славословят, / волсви же со звездою путешествуют: / нас бо ради родися отроча младо, Превечный Бог.

Вместо Трисвятаго: Елицы во Христа крестистеся:

Прокимен, глас 8:

Прокимен: Всѧ землѧ да поклѡнитса тебѣ ѿ поѣтъ тебѣ, да поѣтъ же ѿмени твоѣмѸ, вышній.

Стих: Воскликните гдѣви всѧ землѧ, пойте же ѿмени егѡ, дадите славу хвалѣ егѡ.

Апостол к галатом, зачало 209:

Братие, егда же прїиде кончина лѣта, посла бгъ сна своего единороднаго, раждаемаго ѿ жены, бываема под закономъ, да подзаконныя искѡпитъ, да всыновленїе воспрїимемъ. И понеже естє снове, посла бгъ дха сна своего въ сердца ваша, вопїюща: авва оче. Тѣмже оуже нѣси рабъ, но сынъ: аще ли же сынъ, и наследникъ бжїей иисъ хрїтомъ.

Аллилуиа, глас 1:

Несє повѣдаютъ славу бжїю, творенїе же рѡкъ егѡ возвѣщаетъ твердь.

Стих: День дни ѡрыгаетъ глаголъ, и ношь ноши возвѣщаетъ раздмъ.

Евангелие Матфея, зач. 3.

Иисъ же рѡдшєса въ вифлєемѣ ѡдѣйствемъ во дни йрвда царѧ, сє, волсви ѿ востѡкъ прїидѡша во ієрлїмъ, глаголюще: гдѣ естъ рѡждєйса црѣ ѡдѣйскїй; видѣхомъ во звѣздѣ егѡ на востѡцѣ и прїидѡхомъ поклонїтиса ємѸ. Слышавъ же йрвдъ царь смѡтїсѧ, и весь ієрлїмъ съ нимъ. И собравъ всѧ первосвѣщенники и книжники людскїѧ, вопрошашє ѿ нїхъ: гдѣ хрїтѡсь раждаєтса; Онї же рекѡша ємѸ:

въ вѣдѣніи іудействѣ, такъ во писано єсть пророкомъ: и ты, вѣдѣе, землѣ іудова, ни чїиже мѣнши єси во владыкахъ іудовыхъ: изъ тебѣ во изыдетъ вождь, ѣже оупасетъ люди молъ иїа. **Т**огда ирвдъ тай призвѣ волхвы, и испытоваше ѿ нихъ время явльшїася звѣзды, и пославъ ихъ въ вѣдѣе, рече: шедше испытайте извѣстнѡ ѡ отроцѣхъ: егда же ѡбращете, возвѣстите ми, ѣкѡ да и азъ шедъ поклонюся ємѣ. **О**ни же послѣшавше царѣ, идоша. **И** сѣ, звѣзда, ѣже видѣша на востѡцѣхъ, идоше предъ ними, дондеже пришедши стѣ верхѣ, идоше въ отроцѣ. **В**идѣше же звѣздѣ, возрадовашася радостїю вѣлією зѣлѡ, и пришедше въ храминѣ, видѣша отроцѣ съ мрією мтрїю єгѡ, и падше поклонїшася ємѣ: и ѡверзше сокровища своѣ, принесоша ємѣ дары, златѡ и лїванъ и смѣрнѣ. **И** вѣсть прїемше во снѣ не возвратїтиса ко ирвдѣ, иными пѣтеми ѡидоша во странѣ своѣ.

Причастен: Избавление посла Господь людем Своим. Аллилуиа, трижды.

На трапезе бывает утешение братии великое: и чем слово Златоустаго, емуже начало: Древле убо патриарх:

Аще праздник Рождества Христова случится быти в среду и пяток: разрешаем убо мїряне на мясо, монаси же на сыр и яйца, и ядим убо от Рождества Христова, по вся дни до навечерия святаго Богоявления, мїрстии убо мясо, монаси же сыр и яйца.